

ЎЗБЕКИСТОН РЕСПУБЛИКАСИ ПРЕЗИДЕНТИНИНГ  
ҚАРОРИ

**КАСАНАЧИЛИКНИ ЯНАДА РИВОЖЛАНТИРИШГА ОИД ҚЎШИМЧА ЧОРА-  
ТАДБИРЛАР ТЎҒРИСИДА**

Касаначиларга қулай солиқ режимини жорий этиш, фаолиятини йўлга қўйиш учун уларни молиявий қўллаб-қувватлаш чораларини кенгайтириш, тадбиркорлик субъектлари томонидан ўз фаолиятига касаначиларни кенг жалб қилишни рағбатлантириш орқали аҳолининг бандлигини таъминлаш ва даромадларини кўпайтириш мақсадида:

1. Иш берувчиларга ўзини ўзи банд қилган шахсларни касаначи сифатида товарлар ишлаб чиқариш, ишларни бажариш ва хизматлар кўрсатиш фаолиятига жалб қилишга рухсат берилсин.

Белгилаб қўйилсинки, касаначи сифатида жалб қилинган ўзини ўзи банд қилган шахсларга касаначилик фаолияти учун назарда тутилган имтиёз ва преференциялар билан бирга ўзини ўзи банд қилган шахслар учун белгиланган имтиёз ва преференциялар ҳам қўлланилади.

2. Ўзини ўзи банд қилган шахслар шуғулланиши мумкин бўлган фаолият (ишлар, хизматлар) турлари рўйхати **1-иловага** мувофиқ тўлдирилсин.

3. Белгилансинки, 2023 йил 1 марта 2026 йил 1 январга қадар уч ойдан ортиқ муддатга ўттиз нафардан зиёд касаначиларни белгиланган тартибида жалб қилган ва касаначилик асосида ишлаб чиқарилган маҳсулотларни (кўрсатилган хизматларни) реализация қилишдан олган даромадлари жами даромадининг 60 фоизидан кўпроғини ташкил этган тадбиркорлик субъектлари учун:

фойда солиги ва айланмадан олинадиган солиқнинг солиқ базаси 50 фоизга камайтирилган ҳолда, бироқ тадбиркорлик субъекти томонидан касаначиларга тўланган иш ҳаки миқдорининг 1,5 бараваридан ошмаган миқдорда ҳисобланади;

**2-иловага** мувофиқ давлат мулки обьектларидан фойдаланганлик учун ижара тўловлари 50 фоиз миқдорида белгиланади;

давлат харидлари доирасида тузиладиган шартномаларда бюджет буюртмачилари томонидан 50 фоиз миқдорида олдиндан тўловни амалга ошириш назарда тутилади.

Бунда, мазкур банддаги имтиёzlар ўттиз нафардан ортиқ касаначилар жалб қилинган даврга татбиқ этилсин.

4. Савдо-саноат палатаси ва «Хунарманд» уюшмасининг «Уста-шогирд» мактаблари ўкувчиларига ижтимоий солиқни тўлашнинг ўзини ўзи банд қилган шахслар учун белгиланган тартибини татбиқ этиш тўғрисидаги таклифи маъқуллансин.

Савдо-саноат палатаси Солиқ қўмитаси билан биргалиқда бир ой муддатда ўз маълумотлар базасини солиқ органларининг маълумотлар базаси билан интеграция қилишни таъминласин.

5. «Ижтимоий ҳимоя ягона реестри» ахборот тизими орқали кам таъминланган деб эътироф этилган оиласаларга болалар нафақаси ва моддий ёрдам тайинлашда уларнинг касаначилик ёки қишлоқ хўжалиги ишларига мавсумий жалб қилинган, бироқ олти ойгacha бўлган даврда олган даромадлари инобатга олинмасин.

6. Камбағалликни қисқартириш ва бандлик вазирлиги хузурида юридик шахс мақомига эга бўлмаган Касаначиликни қўллаб-қувватлаш жамғармаси (кейинги ўринларда — Жамғарма) ташкил этилсин.

7. Белгилаб қўйилсинки, 2023 йил 1 марта бошлаб:

касаначиликни молиявий қўллаб-қувватлаш чоралари Жамғарма маблағлари ҳисобидан амалга оширилади;

Камбағалликни қисқартириш ва бандлик вазирлигининг Бандликка қўмаклашиш давлат жамғармаси ҳамда Жамоат ишлари жамғармасига касаначиликни қўллаб-қувватлаш учун Давлат бюджетидан ажратилган трансферлар Жамғармага йўналтирилади, 2024 йилдан

бошлаб — Давлат бюджети параметрларини шакллантиришда ушбу маблағлар Жамғарма учун ажратилиши күзда тутилади.

Камбағалликни қисқартириш ва бандлик вазирлиги бир ҳафта муддатда Жамғарма фаолиятини молиялаштириш учун Ахолини тадбиркорликка жалб қилиш жамғармасидан 100 миллиард сўм миқдорида маблағ ажратсин.

8. 2023 йил 1 мартаңдан шундай тартиб ўрнатилсинки, унга мувофиқ, Жамғарма ҳисобидан:

а) тадбиркорлик субъектларига ҳар бир касаначининг дастлабки уч ой давомидаги касаначилик фаолияти учун бир ойлик ўртача даромади миқдорида бир марталик субсидия улар касаначиликни ташкил этган маҳаллалар жойлашган ҳудудидан қатъи назар ажратилади;

б) тадбиркорлик субъектларига қуидаги субсидиялар ажратилади:

2025 йил 1 январга қадар касаначилик билан шуғулланаётган ишсиз ва иш қидираётган, шунингдек, «Темир дафтар», «Аёллар дафтари», «Ёшлар дафтари» ёки «Ижтимоий ҳимоя ягона реестри»га киритилган фуқароларга асбоб-ускуналар ва хомашё харид қилиш бўйича харажатларини қоплаш учун, бироқ ҳар бир касаначи учун базавий ҳисоблаш миқдорининг 30 бараваригача миқдорда бир марталик;

касаначилик асосида уй шароитида ишлаётган ногиронлиги бўлган шахсларнинг иш жойини мослаштириш учун ҳар бир мослаштирилаётган иш жойи бўйича базавий ҳисоблаш миқдорининг 40 бараваригача миқдорда;

касаначиларни касб-хунарга ўқитишга сарфланадиган харажатларини уч ойгача бўлган муддатда қоплаш учун, бироқ ҳар бир касаначи учун ҳар ойда базавий ҳисоблаш миқдорининг 2 бараваригача миқдорда.

9. 2023 йилда оиласий тадбиркорликни ривожлантириш дастурлари доирасида ажратилаётган кредитларнинг камида 500 миллиард сўми касаначилик ва хунармандчиликни ривожлантириш бўйича лойиҳаларни молиялаштиришга йўналтирилсин.

Белгилансинки, тадбиркорликни ривожлантириш, ахоли бандлигини таъминлаш ва камбағалликни қисқартириш масалалари бўйича туман (шаҳар) ҳокимларининг ёрдамчилари тавсияси асосида тадбиркорлик субъектларига айланма маблағларини тўлдириш учун:

оиласий тадбиркорликни ривожлантириш дастурлари доирасида ҳар бир жалб қилинган касаначи учун 2 миллион сўмгача, бироқ жами 300 миллион сўмгача йиллик 14 фоиз ставкада, 6 ойгача бўлган имтиёзли давр билан 3 йилгача муддатга револьвер кредитлар ажратилади;

Жамғарма ҳисобидан ҳар бир жалб қилинган касаначи учун 1 миллион сўмгача, бироқ жами 150 миллион сўмгача 2 йилгача муддатга фоизсиз ссуда ажратилади.

Мазкур кредит ва ссудаларни тадбиркорлик субъектлари талабига биноан касаначиларнинг банк карталарига ўтказиб берилишига рухсат берилсин.

10. Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимларни Савдо-саноат палатаси билан биргаликда 2023 йил 1 июня қадар давлат улушки мавжуд йирик савдо мажмуалари ва деҳқон бозорлари ҳудудларида доимий хунармандчилик ва касаначилик савдо расталари ташкил этилишини таъминласин.

Бунда:

савдо расталари хунармандлар ва касаначилар томонидан ишлаб чиқарилган маҳсулотларни сотишга мўлжаллансин;

савдо ўринлари ижара тўловлари 50 фоизга камайтирилган ҳолда ижарага берилсин.

11. Камбағалликни қисқартириш ва бандлик вазирининг биринчи ўринbosарига касаначилик фаолиятини ривожлантириш бўйича қуидаги қўшимча вазифалар юклатилсин:

маҳаллаларда касаначиликни ташкил этиш ва ривожлантириш орқали маҳсулот ишлаб чиқариш ва хизматлар кўрсатиш кўламини кенгайтириш;

маҳаллаларда ишсиз фуқароларни касаначиликка жалб қилиш бўйича давлат томонидан рағбатлантирувчи механизmlарни жорий этиш;

касаначилик маҳсулотларининг кооперация усулида, шу жумладан электрон савдо платформалари орқали сотилишига тизимли кўмаклашиш.

Бош вазир ўринбосари Ж.А. Кўчкоров бир ҳафта муддатда 2023 йилда касаначилик асосида аҳолининг бандлигини таъминлаш бўйича ойма-ой маҳаллалар кесимида мақсадли кўрсаткичларни тасдиқласин.

12. Камбағалликни қисқартириш ва бандлик вазирлиги манфаатдор вазирлик ва идоралар билан биргалиқда:

икки ҳафта муддатда Касаначиликни қўллаб-куватлаш жамғармаси тўғрисидаги низом лойиҳасини;

икки ой муддатда қонунчилик ҳужжатларига ушбу қарордан келиб чиқадиган ўзгартириш ва қўшимчалар тўғрисида таклифларни Вазирлар Маҳкамасига киритсан.

13. Мазкур қарорнинг ижросини самарали ташкил қилишга масъул ва шахсий жавобгар этиб камбағалликни қисқартириш ва бандлик вазири Б.А. Мусаев белгилансин.

Қарор ижроси учун масъул идоралар фаолиятини мувофиқлаштириш ва назорат қилиш Бош вазир ўринбосари Ж.А. Кўчкоров зиммасига юклансин.

### Ўзбекистон Республикаси Президенти Ш. МИРЗИЁЕВ

Тошкент ш.,  
2023 йил 23 февраль,  
ПҚ-70-сон

Ўзбекистон Республикаси Президентининг 2023 йил 23 февралдаги ПҚ-70-сон қарорига  
1-ИЛОВА

### Ўзини ўзи банд қилган шахслар шуғулланиши мумкин бўлган қўшимча фаолият (ишлар, хизматлар) турлари

#### РЎЙХАТИ

1. Қайта ишланган жундан кийимлар ва бошқа буюмлар тўқиши
2. Уй шароитида лойдан тандир тайёрлаш
3. Атлас ва адрес тўқиши
4. Майда мунҷоқ (бисер) тикиши
5. Дўппидўзлик маҳсулотларини уй шароитида тайёрлаш
6. Темирчилик маҳсулотларини уй шароитида тайёрлаш
7. Асаларичилик, шунингдек, асалари уяси ва рамкаларини ясаш
8. Куроқчилик усулида кўйлак, кўрпа ва ёпинчиқлар тикиши
9. Қўзиқоринларни териш, уй шароитларида етиштириш ва сотиши
10. Пичноқ тайёрлаш, чархлаш ва сотиши
11. Қоғоздан қутилар, бандероллар тайёрлаш
12. Уй шароитида иссиқхона маҳсулотларини етиштириш
13. Тайёр маҳсулотга этикетка бириктириш
14. Уй шароитида болалар ўйинчоги ишлаб чиқариш
15. Уй шароитида супурги етиштириш ва тайёрлаш
16. Яssi оёқли болалар оёқ кийимларини тайёрлаш
17. Миллий тақинчоқлар ясаш
18. Кандакорлик, мискарлик буюмларини уй шароитида тайёрлаш
19. Дағал жундан гилам, кўрпа ва ёстиқ тайёрлаш

Ўзбекистон Республикаси Президентининг 2023 йил 23 февралдаги ПҚ-70-сон қарорига  
2-ИЛОВА

### Касаначиларни жалб қилган тадбиркорлик субъектларига давлат мулки обьектларини ижара тўловларини 50 фоизга камайтирган ҳолда ижарага бериш

#### ШАРТЛАРИ

Жалб қилинган касаначилар сони	Касаначилар жалб қилинган давр	Касаначилик асосида ишлаб чиқарилган маҳсулотларни (кўрсатилган хизматларни) реализация қилишдан олинган даромад микдори	Давлат мулки обьектининг имтиёз қўлланиладиган энг қўп майдони (кв.м)			
			Тошкент шаҳри	Нукус шахар ва вилоят марказлари	Туман марказлари	Бошқа худудлар
30 нафардан ортиқ	3 ойдан ортиқ	Жами даромаднинг 60 фоизидан ортиқ	220	240	260	280

Изоҳлар:

1. Мазкур имтиёз Тошкент, Нукус шаҳарлари ва вилоят марказлари ҳамда бошқа худудлар бўйича тегишлича ҳудудий зона коэффициенти энг юқори бўлган обьектларга нисбатан қўлланилмайди.
2. Касаначилар билан шартнома бекор қилиниши оқибатида мазкур иловада белгиланган меъёр бузилган тақдирда, жорий ойдан кейинги ойдан бошлаб имтиёз бекор қилинади.
3. Мазкур имтиёзлар қонунчилик хужжатларига мувофиқ ижара тўловларида имтиёзга эга бўлган тадбиркорлик субъектларига татбиқ қилинмайди. Тадбиркорлик субъектлари томонидан ушбу рўйхатда белгиланган майдонга нисбатан:
  - кам майдондан фойдаланганда, хақиқатда фойдаланган майдонга нисбатан имтиёз қўлланилади;
  - кўп майдондан фойдаланганда, имтиёз фақат белгиланган майдон учун қўлланилади.
4. Мазкур илова бўйича давлат мулки обьекти истисно тариқасида электрон савдоларни ўтказмасдан ижарага берилади.
5. Имтиёз асосида ижарага берилган давлат мулки бўйича коммунал хизматлар учун тўловлар ижарага олувчи томонидан амалга оширилади.
6. Мазкур имтиёз хусусийлаштириш дастурларига киритилмаган давлат мулки обьектларига нисбатан татбиқ этилади.
7. Касаначиларни жалб қилган тадбиркорлик субъектларига давлат мулки обьектини ижара тўловларини 50 фоизга камайтирган ҳолда ижарага бериш тартиби Камбағалликни қисқартириш ва бандлик вазирлиги ҳамда Давлат активларини бошқариш агентлиги томонидан белгиланади.

*(Қонунчилик маълумотлари миллий базаси, 24.02.2023 й., 07/23/70/0105-сон)*